

Bortziritako euskarazko irriatiak diruz laguntzeko deialdia

OINARRIAK

1.- Oinarrien xedea. Deialdi honen xedea da Bortziritako euskarazko irriatiak diruz laguntzeko modua arautzea.

2.- Diru laguntzaren onuradunak. Deialdi honetan arautzen diren laguntzen hartzaile izan daiteke Bortziritan emititzeko irriati lizentzia eta egoitza dituen pertsona fisiko edo juridiko oro, euskarazko irriati baten jabe edo kudeatzaile dena.

3.- Diru laguntzaren gaiak. Diruz lagunduko dira euskara hutsezko informazio orokorreko irriatiak, uhin bidez Bortziritan aditzen direnak. Betiere diruz lagunduko dira programazioari dagozkion prestatze, gauzatzeko eta zabaltzeko lanei zuzenean egotzitako gastuak. Diruz lagundutako jarduerak 2012ko urtarrilaren 1aren eta abenduaren 31ren arteko aldiari dagozkionak izanen dira.

4.- Eskabideak aurkezteko epea. Eskabideak aurkezteko epea 2012ko urtarrilaren 25etik otsailaren 10era bitartekoa izango da. Epe hori luzaezina izanen da.

5.- Aurkeztu beharreko dokumentazioa. Eskatzaileek honako dokumentazio hau aurkeztu behar dute:

- a) Eskabide ofiziala beteta.
- b) Identifikazio fiskalaren txartela.
- c) Diru sarreraren eta gastuen aurrekontu zehatza eta xehatua. Sarrerei dagokienez, bertzelako erakunde publikoetan eta bertze autonomia erkidego batzuetako administrazioetan eskatu edo harturiko laguntza guztiak espresuki adieraziko dira, bai eta partikularrek emandakoak edo enpresa pribatuetako bertzelako diru sarrerak (babesak eta publizitatea, errate baterako). Gastuei dagokienez, ongi zehaztu behar dira langileak eta kolaboratzaileak kontratatzen sorturiko gastuak, ustiapen gastu orokorrak eta funtzionamendu eta banaketa gastuak zein eta zenbatekoak diren.
- d) Hedabidearen *on-line* bertsioaren gaineko datuak (horrelakorik bada).
- f) Eskabidea baloratzeko aurkeztu nahi den gainerako dokumentazioa.

Dokumentazioa Bortziritako Euskara Mankomunitatean (Herriko Plaza 7, 2. 31790 Arantza) aurkeztu behar da, edo Herri Administrazioen Araubide Juridikoaren eta Administrazio Prozedura Erkidearen Legearen 38. artikulua aurreikusitako edozein lekutan.

6.- Aurkeztutako eskabidean egindako okerrak zuzentzea. Eskatzaileak aurkeztutako dokumentazioan okerrik dagoela edo agiriren bat falta dela ikusten bada, hamar egun emanen zaizkio eskatzaileari akatsak zuzentzeko edo agiriak osatzeko. Epe hori igaro eta akatsa zuzendu edo agiriak osatu ez badira, eskatzaileak eskaeran atzera egin duela ulertuko da.

7.- Ebazpena. Deialdi honetako diru laguntzak esleitzeko erabakia Bortzirietako Euskara Mankomunitateko Batzorde Erabakitzaileak hartuko du, euskara teknikariaren txostena ikusita. Erabaki hori interesatu guztiei jakinaraziko zaie.

8.- Baloratzeko irizpideak. Diru laguntzak baloratzeko, honako irizpide eta balioak izanen dira kontuan:

a) Urteko emisio orduak: 20 puntu

- Urtean gehienez 2.000 emisio ordu dituztenak: 10 puntu
- Urtean 2.000 emisio ordu baino gehiago dituztenak: 20 puntu

b) Entzule kopuru potentziala, hedabideen audientzia neurtzeko enpresek emandako datuak oinarri hartua: 20 puntu

d) *On-line* bertsioa izatea: 10 puntu

Gehienez ere 50 puntu erdiesten ahal dira, eta diru laguntza jasotzeko beharrezkoa da gutxienez 25 puntu batzea.

9.- Diru laguntzaren zenbatekoa. Aurrekontuetan gehienez ere aurreikusi den diru esleipena, behar den epean eta behar den moduan aurkezten diren eskaeren artean banatuko da, deialdiko baldintzak bete eta ezarritako gutxienerako puntuazioa erdiesten dutenen artean betiere. Aurrekontuan aurreikusitako diru esleipen hori modu proportzionalan banatuko zaie eskatzaileei, lortutako puntuazioaren arabera.

10.- Diru laguntzaren ordainketa. Diru laguntza lau zati berdinetan ordainduko die Bortzirietako Euskara Mankomunitateak eskatzaileei, hiru hilabete behin alegia. Horretarako diruz lagundutako aldi egindakoari buruzko memoria zehaztua eta gastu zein diru sarreraren frogagiriak aurkeztu beharko dituzte. Gainera, azken hiru hilabeteko dokumentazioarekin batera, zinpeko aitortpen bat aurkeztu beharko dute, adieraziz haien diru sarrerak aurkeztutako dokumentazioan agertzen diren horiek direla, eta ez gehiago; eta edozein kasutan sarrera horiek ez direla gastuak baino handiagoak izan.

Horiekin batera, irrati saio bakoitzaren lagina aurkeztu beharko da (paperean edo euskarri informatikoan). Ez da beharrezkoa izanen lagin hori aurkeztea, eskatzaileak on line bertsioa badu eta bertan irrati saio bakoitzaren lagina zintzilikatzen badu.

Aipatutako dokumentazioa hiru hilabeteko bakoitzaren bukaeran aurkeztu behar dute, hau da, martxoaren 30 baino lehen, ekainaren 29a baino lehen, irailaren 28a baino lehen, eta abenduaren 21a baino lehen.

Dokumentazioa Bortzirietako Euskara Mankomunitatean (Herriko Plaza 7, 2. 31790 Arantza) aurkeztu behar da, edo Herri Administrazioen Araubide Juridikoaren eta Administrazio Prozedura Erkidearen Legearen 38. artikulua aurreikusitako edozein lekutan.

Dokumentazio hori aztertu ondotik, teknikariaren txostenean oinarrituta, lehendakariak hiru hilabeteko diru laguntza ordaintzea ebatziko du.

Onuradunak jarduera gauzatu duela behar bezala justifikatu ezean, ordainduriko laguntza osorik edo hein batean itzul dezala eskatzen ahalko zaio.

11.- Bateragarritasuna. Deialdi honetako diru laguntzak bateragarriak dira bertze erakunde publiko zein pribatuk helburu berberaz emandakoekin, betiere gain-finantzaketarik gertatzen ez bada.

12.- Emandako diru laguntzen publizitatea egitea. Onuradunek eman zaien diru laguntzaren publizitate egokia egin beharko dute, eta beren komunikabideetan adierazi beharko dute Bortzirietako Euskara Mankomunitatearen laguntzarekin egindako lana dela. Eskatzaileak web orria baldin badu, bertan mankomunitatea erakunde laguntzaileen artean jarriko du, bere irudi korporatibo ofizialarekin.

13.- Datuen babesa. Eskatzaileen datuak babesteari buruzko abenduaren 23ko 15/1999 Lege Organikoan ezarritakoaren arabera tratatuko dira.

14.- Auzibidea. Deialdi honetan aurreikusten ez den orotarako Administrazioari buruzko uztailaren 2ko 6/1990 Foru Legea eta Diru laguntzei buruzko azaroaren 17ko 38/2003 Legea aplikatuko dira.

15.- Errekurtsoak. Deialdi honen aurka, baita oinarri hauen aurka eta haiek betearazteko hartzen diren administrazio ebazpenen aurka ere, errekurtso hauetako edozein aurkezten ahalko da, aukeran:

- a) Berraztertze errekurtsoa, administrazio egintzaren organo egileari zuzendua, hilabeteko epean, errekurritzen den egintza jakinarazi edo argitaratu eta biharamunetik hasita.
- b) Goiti jotzeko errekurtsoa, Nafarroako Administrazio Auzitegiari zuzendua, hilabeteko epean, errekurritzen den egintza jakinarazi edo argitaratzen denetik aitzina.
- c) Administrazioarekiko auzi errekurtsoa, administrazioarekiko auzien Epaitegiari zuzendua, bi hilabeteko epean. Errekurritzen den egintza jakinarazi edo argitaratu eta biharamunean hasiko da epe hori.

Arantzan, 2012ko urtarrilaren 17an
Mankomunitateko lehendakaria
Jaime Iturria Mitxelena

Diru laguntza eskatzeko orria

Erakunde eskatzailea	
Izena	
Egoitza fiskala (helbidea, herria eta PK)	
Telefonoa	E-posta
Arduraduna	
Izen-deiturak	
Hedabidearen fitxa teknikoa	
✓ Irratiaren izena ✓ Emisio orduak astean eta urtean ✓ Lurralde hedadura ✓ Entzule kopuru potentziala, hedabideen audientziak neurtzeko enpresek emandako datu ofizialetan oinarritua.	
Aurreikusitako diru sarrerak eta gastuak (azalpena eta kopuruak)	
Diru sarrerak Norbanakoen edo bazkideen ekarpenak Publizitatea Bertze erakunde publikoen diru laguntzak (xehatuta) <u>Diru sarrerak guztira</u>	
Gastuak Langileen gastuak Funtzionamendu gastuak Inbertsio gastuak Ekoizpen gastuak <u>Gastuak guztira</u>	
Erantsi beharreko dokumentazioa	
✓ Irrati zabalkundeko zerbitzu publikorako gaikuntza tituluaren kopia.	
On line bertsioaren gaineko informazioa	
Lekua eta data	
Arduradunaren sinadura eta erakundearen zigilua	